

四庫全書

史部

欽定四庫全書

欽定重訂大金國志卷十八

紀年

世宗聖明皇帝下

己亥大定十九年春正月太子允升賊殺其弟晉王允猷
事覺奔和龍帝遣完顏宇追殺之并誅其妻孥八十餘
人

晉王宮僚張克己延晉王允猷宴於南涼觀三鼓方

散晉王因寢及晨觀門微啟有血衣擲地側衛直赫圖亟往視之晉王已殞胸口皆傷侍女四人亦死詔大興府捕賊甚急會前門失官錢有張靚遂寧等在市嬉遊花酒損廢金帛殆不勝算衆疑其盜官錢因擒之聞其篋有金五百兩皆太子允升所賜下獄鞫問乃知殺晉王者此輩實太子使之也縣密以聞大興尹完顏珪密奏帝召二府議之且疑其不然太子允升覺之詰曉微服佩三衛符出門晨夜奔馳凡三

日至和龍

按和龍唐之初城縣司馬光通鑑以黃龍府為和

龍胡三省已辨其誤此所言和龍蓋亦指黃龍府而言乃金之隆州利涉軍也但此書所載允升事本妄

則其所言和龍城之誤固不足辨耳上遣明威將軍完顏宇馳騎追之

宇年老不能馳逐允升至會同宣言南宮子孫弑逆

我今在此發兵救國難國人聞太子至皆信自會同

以北和龍以西皆受調發會宇至人心始疑宇至棟

摩與太子遇宇宣詔且約日合戰至晡太子衆散詰

朝宇進兵懸榜購募和龍人以允升首至有司請誅

其妻孥凡八十餘人諡允猷為元悼太子

按金史並無太子作

亂事且此書既於大定十二年書皇太子允升薨又於十七年書帝與皇太子賞牡丹又於是年叙太子

殺晉玉其自相牴牾已甚謬妄無疑

庚子大定二十年亡遼遺族耶律幹罕為羣牧使

按金史幹罕本

契丹之族先從薩巴為亂山前山後諸羣牧皆應之非幹罕為羣牧使也

聚兵十萬自號後

遼皇帝結北地諸部為援帝遣宣徽使赫舍哩薩必為

元帥將兵八千以討之生擒幹罕割耳鼻五十車封薩

必為金源郡王右丞相

按金史海陵紀正隆六年契丹諸部反世宗紀大定二年九月

右都監完顏思敬獲契丹幹軍餘衆悉平通鑑綱目書
幹軍之叛於正隆六年書幹軍之平於大定二年與金
史同此書於大定三年書幹軍餘黨奔宋亦與史合而
此年又書幹軍叛討平之上距幹軍之平已十八年又
按金史討平幹軍者為布薩忠義赫舍哩志寧完顏思
敬諸人薩必即志寧也忠義薨於大定六年志寧思敬
薨於大定十二年皆不至大
定二十年也此書外誤殊甚

越明年薩必病篤帝問以國事對曰諸部強盛宜早
圖之使彼無壯士方得帝首肯之然帝終仁厚不忍
用兵也

七月立皇子昇王允恭為皇太子

時帝有子七人長曰太子允升次曰昇王允恭次曰

晉王允猷第三第四失其名次曰鄭王允蹈次曰衛

王允濟太子既死允恭以次長當立

按金史宗室表世宗子曰允中

錫王傳云初封許進封趙與趙又進封漢又進封并
又進封錫曰蘇尼趙王無傳曰薩魯越王無傳曰永

功傳云初封鄭改封隋進封曹又進封譙又進封趙
曰永成傳云始封瀋進封幽又進封吳又進封豫曰

永升傳云初封徐與虞徙封隋改封曹又改宛又改夔
曰允蹈傳云初封滕進封徐進封衛徙封鄭曰永德

傳云封薛王進封瀋進封幽進封潞與顯宗衛昭王
共十人其受封者皆在天定二十年之前此云時帝

有子七人與史不合其所言封國亦多與史異

丑辛大定二十一年春二月河東南北路地震平陽河中

府隰懷晉等州地震彌旬晝夜不止壞城壁屋宇人畜

死者甚衆詔官給錢瘞葬優恤死傷之家

按此年地震金史五行志

不

三月詔兗州之曲阜修宣聖墓賜其家子孫粟帛仍給

守視十人

金國之初大軍至曲阜方發宣聖陵尼雅滿聞之問

高慶裔曰孔子何人對曰古之大聖人曰大聖人墓

豈可發耶皆殺之故曲阜得全世宗時南北無事之
久其崇文興化宜矣

壬寅 大定二十二年春三月詔恤民

詔畧曰皇祖有訓非繼體敢忘聖人無心惟百姓是
念朕丕承宏緒二紀於茲祇適先猷不為不遠永言
治理務在恤民萬方有罪罪在朕躬所以當饋興憂
夕惕載懷者也今天下粗安海內無事可使人分巡
風俗申達冤枉孝弟力田給以優復鰥寡孤獨時加

賑濟其有蠹民害政之事一切罷行

按此詔大定美政而金史本紀

不書

秋七月集諸軍講武於宛平澤第賞有差

按金史本紀是年七月宰

臣奏事上頗違豫宰臣請退上使終其奏而此書乃言是月集諸軍講武恐有舛誤

癸卯 大定二十三年春二月以尚書右丞張汝弼攝大尉

致祭至聖文宣王

甲辰 大定二十四年春三月壬寅如上京

按原書於此上二年皆不載事

實今據金史補

乙巳大定二十五年春正月長白山二龍見解角交戲而去

長白山在冷山東南千餘里其山禽獸皆白黑水發

源於此舊名粟末河

按黑水即黑龍江其源曰敖嫩色禽出克魯倫河源西北三百

餘里之小甯武山其出長白山者為松花江即古粟末水下流合活同几河即古混同江松花江自源行

三千六百里至查匪噶山之北方入黑龍江契丹國處以出長白者為黑水此書仍之其於源流尚為未

晰今姑仍舊文而辨正之云契丹聖宗改名混同江按原書云契丹太宗破晉

改名混同江考遼史混同江乃聖宗改名今改正

是月雨土

三月鄭蔡頴等州大水命賑恤之

按此上三事金史五行志皆不書

秋七月以隆暑詔州縣決繫囚

丙午大定二十六年春二月詔曰曩者邊場多事南方未

賓致令孔廟頴落禮典凌遲女巫雜覲淫進非禮自今

有祭孔廟制用酒脯而已犯者以違制論

夏河東大水蚩螽鳴於樹上

按此年大水金史五行志不書

是歲東夷十一國朝貢

未^丁大定二十七年春正月元夕張燈琉璃珠璣翠羽飛仙之類不一至有以金珠為飾者都人男女盛飾觀玩至十八日而罷

金初無元夕張燈之俗己酉歲有南僧被擄至闕遇上元以長竿引燈毬表而出之以為戲太宗見之大駭時有南人謀變事泄而誅太宗疑是人欲嘯聚為亂刻日時立此為信命殺之後數年至燕始識之至今遂盛

三月皇太子允恭薨詔立原王璟為皇太孫

允恭二子長曰豐王珣次曰原王璟璟嫡孫也

按金史太

子允恭薨於大定二十五年皇太孫之立則在是年也又史宗室表顯宗子七人曰璟鄭王曰環瀛王曰璘霍王曰珣瀛王曰珣溫王其二人為章宗宣宗豐王珣即宣宗也此謂太子薨於是年又謂允恭惟二子皆與史不合

戊申大定二十八年秋七月京兆府路總管摩綽錫爾丹以卧沙羊入獻

闕西羊出同州沙苑大角虬上盤至耳最佳者為卧

沙細肋錫爾丹所貢即此羊也

冬十月宋太上皇帝殂廟號高宗遣司農少卿邢璞來
為告哀使

璞至汴京國中賜宴欲行樂璞持不可自朝至夜漏
下三十刻璞持議益堅國中不能奪竟撤樂忽遽而
罷至燕京閣門又令南使服吉帶入見璞又持不可
日將午入見殿上皆淺黃帷幄乃知帝本無他意也

按宋高宗之喪使邢璞至金為告哀使金使弔又使
京鏜至金為報謝使宋史辭樂事見鏜傳羅大經鶴

林玉露所載亦同此
書以為瑣事誤也

己酉大定二十九年春宋以中書舍人鄭僑充賀正且使
閣門張時修副之

僑等以歲暮抵燕時帝病已篤傳旨使人免朝見令
就東上閣門進書僑與時修力爭以為東上閣門者
乃臣子進獻表章之地本朝皇帝國書豈當於此投
進往復爭辨相持至日晚乃令且就館至漏下十數
刻忽傳帝命

按原書云至漏下數十刻乃令且就館
相持至日晚忽傳帝命云云前後倒置

今改正

以使人欲面進書今已過期可遣還明日帝崩

實大定二十九年正月二日也

按金史本紀大定二十九年正月壬辰朔

上大漸不能視朝詔遣宋高麗夏賀正旦使還癸巳上崩於福安殿交聘表云大定二十九年正月壬辰

朔宋顯謨閣學士鄭僑廣州觀察使張時修等賀正旦上大漸宋正旦使還通鑑綱目淳熙十六年己酉

春正月金主雍卒孫璉立二月帝傳位於太子則是世宗之崩在大定二十九年己酉歲而鄭僑張時修

乃二十九年賀正旦之使原書於是年書宋孝宗禪位於二月書宋賀正旦之使於冬而謂世宗之崩為

大定二十九年餘二日據其說則世宗以庚戌年正月二日崩與金史宋史通鑑綱目皆不合其誤無疑

今改正

太子允恭早卒皇太孫璟即位上帝諡曰光天興運文

德武功聖明仁孝皇帝廟號世宗追諡允恭為體道宏

仁英文睿德光孝皇帝廟號顯宗

按原書云追諡帝為世宗允恭為顯宗殊

為外畧今據

金史補正

世宗寬仁愛人雅有大度歷事兩朝親見干戈之荼毒

崎嶇日久心頗厭之中原百姓不堪海陵之虐而大名

王友直之徒相繼並起遼東渤海之衆服其賢厚而正

隆渡江之銳意挫於謳歌之地適南北未定猶有交爭

和好既成迄三十年無寸兵尺鐵之用嘗遇饑年每命所在官司開倉賑恤諸國朝有見其強盛而致疑者終不肯加曖昧之誅是致戶口殷繁充實北人謂之小堯舜云

二月宋孝宗禪位於皇太子是為光宗自稱太上皇移居重華宮

欽定重訂大金國志卷十八

欽定四庫全書

欽定重訂大金國志卷十九

紀年

章宗皇帝上

章宗皇帝名璟世宗皇帝孫顯宗允恭之子也幼好學
善屬文寬裕溫和朝野屬望母趙氏即故降授千牛衛

將軍鄆王楷之幼女

按金史章母曰孝懿皇后國克坦氏父為國克坦貞母為梁國公主

此乃以為宋鄆王楷之女穆妾殊甚世宗時封原王為正嫡孫遂得立為

嗣居春宮未及二年而世宗崩大定二十九年春正月

甲午即皇帝位

按金史章宗紀正月癸巳世宗崩即位於樞前此云甲午即位與史差較一日

二月文武百官各增二級甲辰祀上帝於南郊乙巳享

太社丙午享太廟

三月賜高年孝悌力田者粟帛有差鰥寡孤獨優加賑

恤

按此上二條原書並在明昌元年考金史章宗紀大定二十九年春正月癸巳世宗崩即皇帝位於樞前

丙甲詔賜內外官章恩兩重三品以上者一重免今年租稅鰥寡孤獨人絹一匹米一石此皆大定二十九年

事原書誤以世宗崩於庚戌歲而章宗為不踰年改元故皆書於明昌元年今改正至郊社享廟金史本紀不

書而大定二十九年二月辛酉朔則不得有甲辰乙巳
丙午三日或為明昌元年事亦未可知但原書既與文
武增叙事連書而他又別無可據
姑以類移書於此而附識其疑云

庚戌明昌元年春正月大赦天下改元明昌

按原書書大
赦改元於明

昌元年之前今據
金史本紀改正

遣大臣巡視天下風俗

夏四月翰林學士兼樞密院張克己叅知政事

以有建儲之勲也

左僕射知中書省貝勒加大保同知中書省王昌禹為

右僕射直學士吳與權兼侍中

夏國寇嵐州又寇石州

按懋昭誤謂章宗不踰年改元故以大定末年事係於明昌元

年其金史可據者業已改正至此上四條考之金史尚無明據姑從原書係於是年是歲宋光宗

紹熙元年

辛亥明昌二年春正月加上皇太后尊號曰壽福御宣華

殿集百官及宮人內外命婦大列妓樂又縱諸伶人百

端以為戲樂

按懋昭以章宗為不踰年改元其書上皇太后尊號於明昌二年實則明昌元年也

然考金史后妃傳明昌元年世宗親未終禮官議以五月奉上册寶后以禮所未安弗許上諭有司待來年竟

以二年正月崩於隆慶宮據此則此禮實未嘗行且太后以世宗服未終不受冊寶又安有列妓樂為戲樂乎今姑從原書書於二年而辨正其妄云

三月拜經童為相

經童者僧童也

按金取士之目有七而經童為其一經童謂童子之能通經者金屑持國

由經童入仕至叅政見金史及歸潛志故宋人傳檄有經童作相之語此乃以經童為僧童此與郢書燕說何異姑存而辨正之

夏五月封監女為妃

監女者大金有宮監凡用兵所擄婦女良者皆入此

監以為奴婢所不齒者是時內庭之事惟貴妃之言

是用外庭之事惟奇爾李點檢之說是從

按奇爾李妃之兄

於是朝綱不振軍民胥怨

按金史胥持國為叅知政事在明昌四年李氏封妃

本紀在五年后妃傳在四年此皆書於明昌二年與金史不合

回鶻國使來貢

西夏陷廊坊州又攻保安軍

壬子明昌三年春二月內侍江淵除內都知省益恃恩用

事

帝之登極也尊禮大臣事不自決召朝臣有文學者
及禮學官於宮宴會令以經義相質手筆措問酒酣
各賦詩盡歡淵出入宮掖大受四方餽送國體始弱
矣

癸丑 明昌四年冬十月誅鄭王允蹈

允蹈世宗第六子也於屬為叔先是太子允恭既薨
允蹈次長當立樞密院張克己以宮僚私意贊立太
孫然允蹈性寬厚母亦趙氏

按章宗母圖克坦氏而此書妄以為趙氏則其

言允蹈母亦趙氏者蓋亦妄耳遠避恩寵中外無黨世宗稱其局量

諸武將謂其有外家風不甚附之太孫既立每見之

有愧色是時帝日久酣飲外間奏章不許通京師謠

言云東欲行西欲飛中間一路亦垂垂我醉不醉知

不知完顏高完顏志同見人心危疑且聞帝嘗憾之

密謀立鄭王而鄭王實不知也

按金史允蹈傳郭諫言鄭王相貌非常又

崔溫馬太初私論識記王信其說陰結內侍鄭雨兒伺帝此言完顏高完顏志同謀立王而王不知與史

不合其妹夫唐古布拉

按金史作布拉親

兄察為統軍與高等

相得會於菩提寺高泣謂察曰皇帝昏惑不能君道
公可與弟同達意於鄭王王必許之由是謀議漸廣
高從兄中山守志同弟志寧為從中起內侍俞三德
素惡江淵高密結之伺帝動靜為應會唐古家二奴
以資易馬與張衛為布拉所逐且送大興府鞭之唐
古婢春英先與張通布拉不知也一日婢立於看位
見張從外來隔窻呼之與語告以駙馬與衆謀立鄭
王二奴詣大興告變大興尹蕭宗喬送二奴各囚一

所責狀言之皆同遂密奏帝時帝與鄭宸妃張嬪好
皆醉卧未興申漏六刻江淵以水沃面徐告其故夜
遣東隊主李白曜西隊主張飛龍御前將軍完顏赫
德分兵擒捕置獄會同館獄成鄭王允蹈及駙馬都
尉唐古布拉同母妹新興公主榮安公主並賜死

金按

史允蹈傳但言澤國公主長樂賜死又傳云允蹈妹
韓國公主適河南統軍使布薩揆欲取其軍為助與
妹澤國公主長樂謀使駙馬都尉布拉觀先請婚於
揆以觀其意揆拒却其婚使者不敢復言韓國澤國
蓋即新興榮安之進封但揆既拒絕
布拉則韓國不當並誅史言為允
同逆夷三族其

誅鄭王詔書云天下一家詎可窺於神器公族三宥
卒莫違乎常刑非忘根本骨肉之情蓋為宗社安危
之計亦由涼德有失睦親乃於間歲之中連致逆謀
之起思以義掩至於重典之亟行天高聽卑殆非此
心之得已興言及此惋歎奚窮

是時帝淫佚自用聽讒多疑既誅允蹈又黜其伯允

中於平陽

按金史錫王允中以明昌
六年賜死未嘗言其被黜

寅甲明昌五年春正月大通節度使愛王大辨據五國城

以叛

大辨鄭王允蹈之子也初允蹈三子大辨居長年十六明斷果決封遂寧郡王明昌初遷封愛王大辨間常說其父曰太孫既立大人處嫌疑之地宜思避禍不如乞外鎮可以自安允蹈不從然東宮黨

按章宗既即位

則其故宮臣安可復稱東宮黨以其性寬厚不疑且太妃與允蹈母

為姊妹每相慈愛故張克己等獨以大辨為疑方大辨之生也其母蕭氏夢一人騎馬持刀自南而至稱

云南紹興主遣來覺而與其姑言之及生趙氏捧之而泣曰汝自南來耶尤鍾愛撫育世宗以其母死俾在趙貴人處年十二始遣出會蒙古累寇邊大臣議遣親王統兵鎮撫大辨乃請行世宗以其年弱不許完顏赤曰愛王雖年少然志氣明決度必可任遂遣之至鎮大得諸夷之心及尤蹈之誅也其奴樵夫者急遣人往報愛王使為備越三日以密詔令五國副都統耶律康孫殺之既至康孫與其腹心完顏天應

謀天應得密詔許諾徑携以入示愛王垂淚言曰四大王已死郎君當若何愛王曰公欲見殺我無可奈何天應曰天應受大王父子大恩今日主上所為非人理不可坐受戮辱盍思為救國雪恥計愛王起拜曰惟公命翌日嚴備筵康孫入徐謂曰有詔見殺耶康孫知事泄哀泣祈出都典客古巴桑曰無此事大王且勸中大使酒康孫垂淚飲之急上馬至驛而死次日愛王為父發哀內外諸門悉皆嚴備調發上國

兵七萬為守城計三路提點万俟卬馳驛奏愛王叛國

帝遣東安王瑜將河北兵五萬武定王瑤將燕兵五萬討愛王國兵敗績

瑜等至桑乾州遇愛王將古已桑與戰河北兵大敗瑜僅以身免

三月大起河東陝西路簽軍一十五萬上京路簽軍五萬命東安王瑜完顏進等分路攻討約會於五國城

愛王聞大兵至憂懼不知所出掌書記何大雅說愛

王曰主上以君討臣今茲之來勢頭甚重萬一戰而

不捷後將誰繼不若求援於韃靼

按原書作大朝憐
昭金人而後歸於

宋此書進於端平元年下距宋亡尚四十年而書中
稱元曰大朝稱元帥曰大軍稱元將曰大將元使曰
天使蓋必經元人改竄耳元至世祖至元八年始改
國號至元以前尚號蒙古又是書於大安三年云韃
靼至是改稱大蒙古國則是書自大安三年以前當
稱韃靼大安三年以後當稱蒙古今悉改正以從其
實且以別內
外之辭云 愛王許諾遣大雅往聘約以子雄為質

破國之後軍儲金帛惟其所取許之

夏五月完顏進等擊敗古巴桑於東堙津和寶努築壘
北狐口邀奪進糧帝又遣蕭繼努等伏兵破殺之

進等兵至東堙津古巴桑戰敗退保五樓城進追至
城下因圍守之愛王遣親將和寶努當北狐口兩山
之間築城堡堅守不動糧車至輒為所奪進軍乏食
天時方暑率皆饑困二十七日帝遣完顏宗慶往攻
寶努壘以通運路內樞密王漸固爭謂宗慶輕銳無
謀用之必敗事宗慶亦不欲行乃遣蕭繼努李用辰

往繖努將至北狐口天漸明大霧四起遣上國兵四
千人藏伏北狐之下以糧車自東路上鳴鼓張旗運
夫呼嘯和寶努出兵襲之勝負未定伏兵修起奪其
城植旗於上和寶努兵顧見之皆驚潰寶努自殺運
路遂通

何大雅求援韃靼兵至五樓完顏進等與戰敗績

時愛王見勢急其妻兄烏勒沁與子雄守城自往北
地至平天漠而大雅將兵已至愛王大喜以手指天

乃下馬與韃靼首將稽首相見奉獻金寶十車首將

喜曰大王無慮侍郎與戰

北人言我為郎也

兵將至五樓進

等與戰北人禿體大過以入以一當百進兵大敗乘

勝襲逐至和龍東津

按愛王之事不見於史如此書所言則喪師失地其為變故不

少何以金史紀傳殊無一語及之又考元史本紀元太祖六年始興師伐金當金衛紹王天安三年章宗之時雖已稱帝然尚未叛金太祖本紀云初帝貢歲幣於金金主使衛王允濟受貢於靜州帝見允濟不為禮允濟嗣位欲俛帝再入貢害之帝知之遂與金絕元聖武親征記云金丞相完顏襄帥兵逐叛者北走上聞之率兵自鄂諾河追討金主授帝為察罕圖魯完顏襄為丞相正當明昌時也則章宗時元未伐

欽定四庫全書

卷十九

金明矣此書所言愛王興師又言元師助愛王伐金大舉深入大書不一書皆妄言爾

六月宋孝宗殂嗣帝光宗卧疾猶未能出就內中成服
秋七月宋光宗禪位於皇太子是為寧宗遣使鄭滉來
告登位范仲士副之

乙卯明昌六年自愛王之叛師旅大喪帝頗憂之太后亦
勸帝勤國事江淵等每以歡言解之曰兵師雖敗死亡
無多鄭宸妃執盃勸帝遂歌解愁曲且曰用兵勝敗亦
是常事外間人喜禍欲皇帝成疾帝喜復縱飲達旦以

是為常

宸妃者故南宋華原郡王居中之曾孫女也在世宗
晚年甚嬖之江淵及內侍江從一李璉侍上宴因言
昭儀善舞帝見而喜令淵納之集慶宮晨夕往焉帝
時或酣醉日昃不果視朝三省黃案委令裁決昭儀
或坐膝上批詔內降慈黠便媚善能詼諧淵等各獻
珍寶服玩以相固結太后以為言帝令改姓鄭氏號
宸妃

按章宗之寵妃為李元妃所稱李師兒者也據
此書則妃本鄭居中之曾孫至是改還原姓故

欽定四庫全書

金史卷十九

十一

是書於此後皆稱鄭宸妃此說雖不見於金史或史文疎畧亦未可知但史云李氏以監戶女子入宮歸潛志云李氏家因罪没入宮為奴婢屬監戶李氏少給事太后章宗見而悅之則是李師兒第出於微賤而已而此書乃云曾為世宗所寵加章宗以聚麀之醜其為誣譏大矣泰和南征宋人傳檄有經童作相監女為妃之語若果章宗納其父妾檄中斷無不言則此書之妄可知又章宗雖非全辟然史言其尚有志於治而此書詆訾不遺餘力意懣昭必不得志於明昌泰和之世故歸南以後遂肆其誣妄如此錢曾以為無禮於其君之尤者非過言矣

是歲宋寧宗慶元元年

丙辰 承安元年内侍御江洲侍寵擅權完顏偉上疏切諫

淵諷御史臺劾黜之

時江淵用事太后與帝皆信之淵公受賂遺除拜生
殺皆出其口或以事故不入則機務填塞不即報下
張克己等朝夕其門夏人入寇河東陝西喪師連年
淵皆不即以聞完顏偉上疏諫在都堂慷慨謂右諫
議鄭遂良曰太宗皇帝與忠獻王忠烈王百戰以有
天下忠烈王臨終以夏人蒙古為憂遺奏極切今乃
內外偷安惡聞敵患獨不聞耶律趙氏將亡之時乎

淵聞而惡之諷東臺御史劾其罪除名為民徙居代

州偉乃忠烈王烏珠之次子也年已六十性耿介習

兵事偉既貶中外惕息

按金史太后崩於明昌二年烏珠子二人皆為海陵所殺

此所言與史皆不合

丁巳承安二年時天下大旱山東及澤潞間寇盜屯結有

至萬餘人者乃遣龍虎將軍張天翼統兵討之軍裝不

給兵士怨詈江淵弟為監軍使奏乞資賞不能得及潞

州連敗於賊天翼死焉

大正十三年

亦離不聽詰旦早朝邁坐於待漏院淵揚馬過罵之
曰癡南虜敢言我家兄弟耶邁遂求出知鄭州淵怒
其抵抗遂移潞州監督軍糧欲以乏軍興之罪令其
弟害之邁哀祈於左僕射完顏守貞守貞言於淵遂
寢新命至十二月丙寅天翼源辭行至會同館源聞
所調之兵怨語籍籍懼為己害歸白其兄乞免行天
翼因其懼令奏諸朝求添賜以結軍心有旨從之然
有司視為文具支給減裂至安肅軍天翼懼變連奏


乞厚加資賞有旨令河東運司支辦及潞州與賊連
戰皆敗天翼戰死冠勢遂張潰兵皆聚天井關潞守
張清臣不知為計急奏求援

戊午

承安三年春帝幸蓬萊院飲宴內侍都知江淵與馬
時所陳玉器及諸玩好盈前其篆識多南宋宣和物
帝惻然動色宸妃解之曰作者未必用用者未必作
南帝但作此以為陛下用耳宸妃嘗與帝同輦過御
龍橋見石白如雪歸而愛之白國主於蘇山輦至築

巖洞於芳華閣凡用工二萬人牛馬七百乘道路相望會是冬賞菊於東明園帝登其閣見屏間畫宣和艮嶽問內侍余琬曰此底甚處琬曰趙家宣和帝運東南花石築艮嶽致亡國敗家先帝命圖之以為戒宸妃怒曰宣和之亡不緣此事乃是用童貫梁師成耳蓋譏琬也顧見江淵又謂曰我嫌余琬來破壞我事却又忘了都知淵合手謝時朝政多秕名器混濫吏部尚書余淵明奏言旬日之間斜封補官凡二百

人乞行追汰奏入不省起居郎無諫院穆良器上疏
諫貶濮州同知



欽定重訂大金國志卷十九

欽定四庫全書

史部

欽定重訂大金國志卷

二十一至
二十四

詳校官庶吉士_臣張漣

編修_臣裴謙覆勘

總校官舉人_臣章維桓

校對官編修_臣孫希旦

謄錄監生_臣姚濬

欽定四庫全書

欽定四庫全書

元年

章宗皇帝中

承安四年春二月詔建太學於京城之南總為屋七

牛有五區西序置古金文籍秘書省新所賜書東序置三

代鼎彝俎豆敦盤尊彝及春秋釋奠合用祭器於是行

禮於辟雍祀先師孔子名郡國學生通一經以上者居

之公卿以下子孫並入學受業每季臨觀課其優劣學徒甚盛諸生獻詩頌文賦者四百人

帝博學工詩曾於雲龍川泰和殿賞牡丹詠詩時五月初也詩云洛陽穀雨紅千葉嶺上朱明玉一枝地力發生雖有異天工造物本無私

先是顯宗亦嗜酒疑當作詩曾於世宗朝右相石琚生日

賜一詩云黃閣今姚宋青宮舊綺園繡絺歸里社冠蓋盡都門善訓懷師席深仁寄壽尊所期河潤溥餘

福被元元又次高駢風箏韻云心與寥寥太古通手
隨輕籟入天風山長水濶尋無處聲在亂雲空碧中
皆得詩人風騷之旨也

秋九月太后趙氏崩

按章宗母仁懿皇后圖克坦氏明昌二年崩此云太后趙氏又書太

后之崩於承安四年與史抵牾之甚

太后寢疾時帝入問起居宸妃亦至后曰我有一心
願未遂宸妃能成我意乎我家三四百口為煬王所
殺叢塚在和龍我欲創一寺在彼以追薦冥福歲時

莫享我不敢費公錢我自有錢七萬可以辦汝但說
與皇帝要時省得我死瞑目矣越旬太后崩宸妃以
其遺留分與中外姻親及諸趙女之在京遠近者以

手詔下和龍府

按遼之黃龍府金時為隆州
利涉軍金初無和龍府也

起大明

寺造九級浮圖遣太后殿內侍候行往監造務極壯
麗且度僧三萬人施以度牒時征行調發民方厭苦
有度僧之命遠近奔赴遂及五萬人於寺邊建八寺
以處之右諫議胡列壁諫不省

按章宗太后為圖克
坦克氏此書以為趙

氏又謂太后欲為趙氏
創寺薦福皆妄言耳

時國兵屢敗愛王據和龍以北凡國家始興之地皆
失之帝見兵革未已心亦憂之宸妃及諸御女多勸
以酒嘗乘小馬命宮人携酒肴鼓樂徧趨池館意之
所悅必留飲至夜嘗一日謂魯王琚曰蹈叔父子如
此傲者必多人多勸我莫與汝等語琚泣曰兄弟不
信尚誰信耶周公誅管叔蔡叔封康叔豈可以一槩
疑之由是諸王皆緘默

庚申 承安五年遣秘書監虞世奕說愛王以世襲王封竟
不得要約而還

自愛王叛後北兵連年深入加以荒旱所在盜發故
遣世奕說愛王而愛王不從

韃靼軍深入至斯波川駐兵十日以俟河冰合和龍帥
完顏大康集兵禦之於東津

韃靼軍長驅而前愛王之兵在後大康令人椎冰伐
柴薪燒川燎於岸剡木為舟中積熾炭冰不能合北

軍在對岸愛王兵與之合自君子津濟

十二月丁酉韃靼軍陷上都城己酉陷和龍取東灤平

三州

按原書上都作大都灤作灤考金史地理志金無大都亦無東州灤州據後言會寧陷失平灤破壞

則大都當作上都灤當作灤今改正但此所言本妄其於京州之誤蓋尚為小失耳

余崇義遣人持重賂說蒙古襲草地韃靼軍聞之始退

師

時大康兵潰其子根在城中與同知章去疾極力守

城韃靼軍攻之凡十七日大城陷去疾退守子城北

軍拆民屋為層樓用牛車挽橋梁石裝砲當之者糜
碎二十九日和龍又陷遂取東灤平三州余崇義遣
樞密官屬邱好古載金玉美女自山後出珠敦踰大
漠涉東韓白龍城使於蒙古蒙古聞使至甚喜好古
因說之襲草地可以大獲蒙古從之三月蒙古攻北
部敗其衆於骨邱追襲餘兵徑至楊格城韃靼軍聞
之始懼急回師然大興以北千里蕭條耕桑俱廢加
以旱暵民不聊生

宋遣戶部尚書郎中趙善義來賀生辰未幾又遣都官郎中吳玠為孝宗太上后崩告哀使

善義還至雍邱因與國人爭下車子處忽謂之曰爾方為北國所擾何暇與我交爭莫待要南朝起兵夾攻耶其下共調護之伴使乃不爭翼日伴使謂善義曰昨日國信尚書所言某等歸上頭莫須奏過否善義惶恐以醉為辭且謝之事聞趙善義遂坐奉使生事免官

吳旰之使也趙善義未還國中以奉使驟來疑偵國中事故旰至旰貽未即約陰遣人至臨安伺之得其實而歸乃遣使來迎旰入境與善義遇於塗兩使分道而過各不相聞但私以片紙往來而已

秋宋光宗殂

辛酉 泰和元年羣牧使耶律德壽叛聚兵數萬以揚威為大帥帝拜十一騎為元帥赫舍哩善樂為招討使將兵三十萬以擊之誅德壽揚威遂追其餘衆至草地凡六

十日而歸

按十一騎之義
未詳疑有訛脫

冬浚界壕

深廣三丈東接高麗西達夏境列屯戍兵數千里防
其復至

是歲宋寧宗嘉泰元年

壬戌泰和二年五月帝大宴於西涼觀

鄂王資起白帝曰天時人事不順如此日已晡恐勞
聖躬請駕興帝曰方與諸王公樂飲何勞耶資泣曰

國兵屢敗邊地蕭條兩河盜起北兵雖退差涼復來
豈是樂飲時也帝曰我嘗謂與公等相見偏說撓人
心懷事資遂請退不許且曰王欲飲酖耶侍郎李西
華前曰資是憂國然言之非時不足加罪帝曰卿等
常自為一黨以非我耶自是多以暑熱不視朝日夕
與宸妃及諸內侍為長夜飲

詔大興府擇民間女子十三歲以上有姿色黠慧者選
三百人進入禁中教為酒令及勅習市肆歌勸酒

大興尹完顏天穆奏稱天旱正屬祈禱索女恐招怨
詈且非敬天修德之事翼日有旨降秩罷知耀州

癸亥泰和三年時宸妃嬖幸用事軍中奏報悉令宸妃裁

決宸妃見有急切多屏不奏間有少撓則以示帝且喜

且笑會寧陷失平瀾破壞帝皆不知也一日謝世雲完

顏世卿奏言之帝始駭然顧問內侍直李汝回曰汝輩

更不說耶汝回曰章疏在宸妃處臣等何由得見世卿

曰太宗討趙氏之罪凡携其三千口來今日亂國家皆

是其女此孽妖也世雲曰亂匪降自天生自婦人婦有長舌維厲之階信哉

甲子泰和四年春三月中天以北其色殷紅如血

按此事金史五

行志不書

司天官奏曰十年後主天下大亂帝怒曰如此全

盛豈十年能亂之乎

夏六月愛王發疾卒其子三大王雄立韃靼將共戍其國且約以進兵雄以持父喪辭韃靼將怒遣其掌文官顏飛青讓之

初愛王定約以國家初起之地及故遼封疆自溝內
以北歸之於北溝南則為己有累歲結謀用兵愛王
無分毫得也至是使來貢之雄畏懼而從

冬十二月雄葬父愛王於冷山遂從韃靼進兵

按郝經

青城行云最苦愛王兩家族二十餘年不曾出朝朝點
數到堂前每向官司求米肉男哥女妹自夫婦覲而相
看冤更酷蓋以章宗傷殘骨肉愛王一家皆遭禁閉而
其後金后妃起元師於青城故言此以著天道好還之
意此書乃言愛王子三大王雄嘗與元師伐金則是愛
王之子女初未囚繫而借師以破金其冤亦少雪矣豈
以待青城之事乎
此可以知其妄也

欽定重訂大金國志卷二十

欽定四庫全書

欽定重訂大金國志卷二十一

紀年

章宗皇帝下

乙丑泰和五年春正月韃靼軍至北陝口進次桑乾完顏天穆天與皆力戰死之

完顏天穆將兵五萬人與韃靼軍戰於北陝口自辰至酉我兵疲憊敵益添生兵我兵不敵天穆率麾下

在前殊死戰及暮勝負未決天寒甚韃靼軍舉火彌漫山谷詰朝萬衆壓壘矢石如雨天穆命以刀車衛之隨開隨合日晚皆饑渴兵遂潰天穆傷甚左右欲載以馬輿先奔天穆曰不可吾曾大父為開國功臣吾為子孫不能救國之敗何面目見宗廟乎奮劍大呼瘡裂而死韃靼軍進至桑乾完顏天與聞其兄死憤甚持兵禦之於舊坪望見有虎皮蒙馬居中者直前以槊刺之不勝而死烏富呼烏蘭德木收衆天都

山兵不甚敗

二月韃靼軍退既出境三日平州始有警報烏富呼自平朔引兵晝夜行至平州而大隊已去

三月韃靼軍陷末波城出白道敗統軍兵殺二戍將及千戶和勒博和

夏四月韃靼軍自飛狐道回河東嵐代州皆震

五月秘書監起居舍人韓伯獻奏稱敵人以生啗為糧難於野戰請於敵人經由險要之地築城堅守乃遣使

督兵築古北口東陘二城

伯獻上言敵國之軍生啗為糧戰陣之間不患饑渴則戰有餘力我兵與角力不暇則饑渴交迫易至疲憊以此較之野戰非所長臣乞於幽燕以北及敵人經由之地控扼險要不必與戰則其勢自沮蕪牛馬索馳之類並皆收牧置之城內彼無所掠則將自食其所有余崇義亦然之遣使者督兵築城時歲饑耕獵皆廢河北河南山東之民貧悴饑疫無力以耕寇

盜蜂起沿邊及遼西悉為北軍攻陷至此又遣調築
城役及老弱婦女京畿之民素不習勞大興府及上
京路帥守皆出榜勸諭謂敵若深入則民皆不保與
其死於干戈之慘曷若勞苦於城郭之間由是民始
遣隊伍就役至八月末築古北口東陘二城蓋樓櫓
未備而遊騎駸駸來矣

冬十一月北軍分兩道一自白檀一自靡陂奏至帝集
羣臣議之乃以徐王律明為統兵監軍我師敗績

秘省及諸省官皆請遷都以避難聶希古正色曰此策之下者未可議徐王律明充王天驥曰兵已遠來請自前往議之翼日以律明為河東道統兵監軍律明至軍率衆鑿溝引白溝及白檀河以自固韃靼軍至水傍睥睨起三日風緊雪飛及曉冰厚五尺餘兵悉渡乃以炬火鎔冰撤壘屋竹木茅等盡燒於冰上其衆騰躍我兵大敗律明等僅以身免夜入秦長城會國中遣竇永固來援律明天驥令依山入城且報

慶州令堅守北軍聞西夏之警乃回師

是歲宋寧宗開禧元年

丙寅泰和六年春正月詔求直言權叅政富察烏嚕條陳
備敵六事詔付省院詳酌施行

夏四月南宋遣鎮江都統制陳孝廣取泗州又取虹縣
統制許進取新息縣孫成取褒信縣王大節為江州都
統引兵取蔡州不克而潰

帝得汴京留守完顏童奏晨起謂大臣曰南兵敢來

可謂我國無人知樞密院余崇義曰陛下有天下之
全豈偏方可比但近年不務勤儉天災流行民窮國
困南兵亦宜來但此不足慮只恐秋冬之間北兵必
將復動西夏窺陝四國皆驚為可憂耳帝曰君勿他
言我問南方事宜急圖之

自隆興甲申南宋與我再和逮開禧丙寅凡四十三
年是年五月丙戌宋寧宗內批北金世仇有稽報復
爰遵先志決策討除宜頒詔旨明示海內翌日下北

伐之詔

五月遣平章事布薩揆為宣撫使駐開封

宋鎮江都統戚拱遣人結漣水縣弓手李全焚我漣

水縣

按宋史本紀戚拱取漣水縣乃上年事

皇甫斌引兵攻我唐州敗

馬池州副都統郭倬馬軍司李汝翼會兵攻我宿州

亦敗倬等還至蘄縣我兵圍之倬執馬軍司統制田

俊邁以與我師乃得免

按原書不言田俊邁據通鑑綱目補

六月宋李璣以建康都統侵壽州敗績田琳

按宋史作田彬以

建康副都統取壽春府

宋叛臣吳曦遣其客姚淮源來獻關外四州之地求封為蜀王帝賜以金印詔封為蜀王

冬十一月起民兵於河南十七萬入淮十萬入荆襄又起河北十萬戎居庸關及韓水大雞川以防北邊

內外騷動民聚為盜始益衆矣

我師自清河口渡淮宋守將郭超失利遂進圍楚州偏師趨棗陽軍又圍廬州守將田琳拒我師八日圍解又

圍和州取信陽軍圍襄陽府又取隨州

按原書誤作遂州據宋史改正

宋守將遁州人具香花迎拜斂兵不殺遂之德安攻真州於是濠州安豐及並邊儲戍皆為我兵所取又取西和州

十二月圍德安府為守將李師尹所敗取成州守臣辛樞之遁攻六合縣遇宋師於西浦橋

按宋史本紀作胥浦橋

宋師

大敗宋將郭倪棄揚州走瓜洲渡

按金時分道伐宋布薩揆兵三萬出賴壽

先顏遣兵二萬五千出唐鄧赫舍哩子仁兵三萬出渦口吁沙吁兵二萬出清河口完顏充兵一萬出陳倉富

蔡貞兵一萬出成紀完顏綱兵一萬出臨漳舒穆魯仲溫兵五千出鹽州完顏璘五千出來遠國廬州和州至六合者檄之兵也國楚州者呼沙呼之兵也克西和州及成州者貞之兵也趙襄陽團襄陽克隨州遂圓德安者匡之兵也書中所叙未斷今據金史宋史附識於此

遣使吳端持詔印授吳曦於岷口曦自岷口歸興州以帝命稱蜀王

諸將自淮南退師

是月壬申夜興州天赤如血照地如晝自月初有兩日相摩於初晴之時至是復有此異

按此事金史天文志不書

是歲蒙古却特特穆津即皇帝位於鄂諾河稱元年是

為元太祖

按原書不書元太祖即帝位殊為疎畧今補正

丁卯泰和七年春宋遣盱眙小吏王文持書幣來行省完

顏弼

按金史本紀七年正月庚寅僕散揆還駐下蔡而病丙申以左丞相宗浩行省於南京以代揆宋史

方信孺傳及通鑑綱目皆云信孺至汴見左丞相完顏

宗浩又金史完顏弼傳弼時為南京副留守行省之事

當以宋浩為主不應

合宗浩而書弼也

右副元帥赫舍哩子寧

按宋史金史皆作子

仁皆有和意

夏五月宋遣使方信孺來以通謝國信叅議和好

六月宋再遣林拱辰來使林仲虎副之

先是信孺至河南行省求和元帥布薩揆許納南使

按宋史及通鑑綱目信孺三使金師其時行省元帥為完顏宗浩布薩揆是年二月還至下蔡而卒此云

揆納南使誤也且禮遣之信孺既得請揆復諭之曰已奏朝

廷更得宣撫一書與西元帥乃善宋朝諭旨安丙作

書如所云且餉以藥物絹帛西帥啟緘却餽而令鳳

翔路都統使完顏昱作書以遺宋大畧云當聽命於

行省而已

宋誅其叛臣吳曦所獻國中四州旋為宋人所取

宋遣三使來國中一通謝一告哀一賀生辰

按是年五月宋成肅

太皇太后上仙

故有告哀使

通謝使者林拱辰是也國中遣迂使宣諭曰皇帝聖

旨南使中惟李壁吳玕

按金史完顏宗浩傳交聘表皆作吳玕

朱致知

李大性四人言語可信當遣來議事今所遣小使且

還

時我所索於宋者五事一割兩淮二增歲幣三犒軍

金帛四取歸正人及陷沒州郡五取韓侂冑首級由是韓侂冑聞之大怒復有用兵意

冬十一月乙亥宋人殛殺韓侂冑於玉津園側

十二月宋遣許奕吳衡來充通問使

并言開禧權臣殺首故也

按原書於泰和七年十二月書宋遣許奕吳衡來使

八年春書宋仍遣謝奕來使而分註云并言開禧權臣殺首故也考金史交聘表及宋史本紀是時惟遣許奕使金初無謝奕且許奕之使在侂冑既誅之後國書中必言侂冑之誅以謝金豈有此時不言至春方遣使言之蓋許奕之使在十二月其至金當在明年之春原書遂致複出又訛許奕為謝奕今改正

戊辰泰和八年春宋梟韓侂冑之首於兩淮

帝遣諭成使完顏侃喬宇使於宋

由是和議復成以大散關及濠州歸於宋

夏五月甲子太白經天

按金史天文志七月朔太白晝見

西夏遣使求援於我帝不應

先是泰和六年帝大發兵侵韃靼諸

按金史兵志有部族

字書無 紇字此書作

紇疑 紇即紇字之變 生蕃也鄰接北邊號曰驍騎有

衆三萬盡數起發南伐次年罷兵和好諸

賞不均皆叛北歸太學生李藻上書言宮中事帝大怒勅斷杖一百牛逢辰白綸田廣明者亦上書勸北伐帝以為擅欲興師規圖進用亦皆杖一百由是四人挈其家亡之北地相與獻謀又有諸紕輸其力於是北軍益銳恐西夏議其後乃大舉兵攻之至是西夏遣使求援帝不應臣僚諫曰西夏既亡必來加我不如與西夏首尾夾攻可以進取而退守帝曰敵人相攻中國之福吾何患焉不聽

冬十一月丙辰帝崩在位十九年

按章宗明昌盡六年
承安盡五年泰和盡

八年凡在位十九年原
書誤作二十年今改正

章宗性好儒術即位數年後興建太學儒風盛行學士
院選五六人充院官談經論道吟哦自適羣臣中有詩
文稍工者必籍記名姓擢居要地庶幾文物彬彬矣惜
其十年以後極意聲色之娛內外嗷嗷機事俱廢間出
視朝不過頃暫回宮與鄭宸妃李才人穆昭儀並馬遊
後苑因留宴俟月上奏鼓吹而歸以是為常張天貴江

淵等用事聾瞽昏荒朝中陳奏便宜多不省覽愛王叛
於內邊釁開於外盜賊公行道路充斥邊疆多事兵連
禍結矣是歲宋寧宗嘉定元年

欽定重訂大金國志卷二十一

欽定四庫全書

欽定重訂大金國志卷二十二

紀年

東海郡侯上

東海郡侯名允濟世宗第七子也章宗朝封衛王為奉
聖軍節度使又權參知政事行省事於河北章宗崩無
子而世宗之諸子惟允濟在章宗所嬖內侍李新喜傳
遺詔於尚書右丞薩克蘇即完顏圭共立之十一月丙寅允

濟即位

按金史衛紹王紀丙辰章宗崩完顏匡等傳遺詔立衛王即位於樞前此作丙寅與史不同考

是月丁酉朔至丙寅已踰月果爾則

拜薩克蘇太師領

史當書十二月即位蓋此書誤隔

三省事封申王詔羣臣先緣事故罷者悉復叙用之其

見居官者並增爵位各有差

詔北邊連年用兵肝腦塗地貧人困悴言之惻然可令

所在官司存問賑恤

己巳大安元年正月改元大赦天下

二月帝親祈天告祖宗之靈而誓衆銳欲北征聽羣臣

之諫而止

敵人聞帝新立而喜曰彼老懦無能為不足畏也遂
決意南侵

癸感入太微垣犯執法

按金史天文志十月乙亥月食
癸感歲星犯左執法宋史嘉定

二年二月乙酉大星
犯太微垣上相星

秋七月丙申詔百辟求言

是歲不稔自四月至六月不雨內出寶器及圖書文
畫付雜買場賣又諭民納粟補官時州郡無富室迄

無應命聞西夏及北方稻麥皆熟時陝西差稔河南

高田種不入土獨齊魯之間田差有秋

按金史五行志承安二年

自四月不雨至於六月雨
復不止此誤書於元年

庚午大安二年春二月詔河東河北沿邊募饑民修水利

令所在官司任責

三月詔内外百官條陳禦敵之策又詔去歲荒歉所在

流民失業在處閒地曠土甚多官為給其牛種貸以資

糧候歲有成官司量與收入

夏六月丁巳朔日有食之

辛未大安三年春禮部兼太常卿杜世昌奏請郊天地用周禮春秋祈穀之制且倣春秋龍見而雩之說勸帝親祀南郊與地祇合祭先一日祭太廟於大興殿

時張慶之以為不可世昌曰朝廷閔雨偏走羣望今種多不入土若一歲得稔便可少安不告之天將安禱也衆以為然遂請行之

秘監邵文虎奏乞州縣立力田科

初遣使行諸路觀田之墾廢以為守令殿最

是春西夏始為韃靼軍所攻復遣使求援帝新立不能
救北軍至興靈而返

時夏亦為我國所擾勢益衰弱夏人恨遂叛乃改元
光定

韃靼國勢益強但居其故地於燕雲置行省命其大臣

領之所謂太師國王也

按燕為金之大興府是時為帝
都雲為金之西京大同府是時

金五京如故元安得於
其地置行省斯言妄甚

韃靼之先在元魏齊周之時稱勿吉至隋稱靺鞨地
直長安東北六千里東瀕海離為數十部有黑水白
山等名白山本臣高麗唐滅高麗其遺人并入渤海
惟黑水完疆及渤海為盛靺鞨皆役屬之後為奚契
丹所攻部族分散其居混同江之上初名曰女直混
同江即鴨綠水之源按鴨綠江出長白山之南麓西
南經高麗入海混同江即今活
同凡河出長白山之北西北行三千六百里而入黑
龍江二水同出於長白而一南一北源流各異此合
而一之
誤矣蓋古肅慎之地也乃黑水之後其居陰山者

自號為韃靼

按五代史云韃靼韃靼之後本在奚契丹東北後為契丹所攻部族分散或屬

契丹或屬渤海別部散居陰山者自號韃靼與此可以相証

唐末五代常通中國

宋初各再入貢韃靼之人皆勇悍善戰其近漢地者謂之熟韃靼止以射獵為生無器甲矢用骨鏃而已

蓋以地不產鐵故也契丹雖通其和市而鐵禁甚嚴及金得河東廢夾錫錢執劉豫又廢鐵錢由是秦晉鐵錢皆歸韃靼韃靼得之遂大作軍器而國以益強方金國盛時韃靼歲時入貢衛王既立韃靼主特穆

津始稱青吉斯皇帝山東兩河皆為所收附笑按原

於元皆稱曰大朝獨此條與下條黑黠剌白黠剌仍稱黠剌蓋以其文義皆不可曰大朝故也則知凡稱

大朝者必出於元人之所改明矣

又有蒙骨國者在女直之東北唐謂之蒙兀部金國

謂之蒙兀亦謂之萌骨按下文言蒙古有東西二國此即蒙古國之在東者蒙骨

蒙兀萌骨皆蒙古之語訛前已於天會天眷皇統年間所書改正惟此年與後崇慶三年所稱因與元初

國號相混姑仍原文以相別云人不久食夜中能視以鮫魚皮為甲

可捍流矢自天眷間始叛都元帥宗弼用兵連年卒

不能討但分兵據守要害及厚賂之其國亦自稱祖
元皇帝時為邊患每遣使以子女玉帛厚賂其國則
敵為內顧而回師至是韃靼乃自號大蒙古國然二
國居東西兩方相望凡數千里不知何以合為一名

按此書言蒙古有東西二國其在東者即下文言據
金太宗舊地七十二團寨原書天會八年稱萌骨子
天眷元年稱蒙古兀皇統六年七年稱育骨子蒙古今
既正為蒙古者皆此國也其在西者即下文言北方
之境東接臨潢西隣夏國南距靜州北抵大國皆
為所有者原書自承安三年以後稱為大朝大國稱
其軍為大軍將為大將使為天使今改正為蒙古蒙
古軍蒙古將蒙古使者此即元之初國號也韃靼為

靺鞨之遺民蒙古又韃靼之別部豈其在東者即五代文所謂靺鞨為契丹所破屬於契丹渤海者其後亦號蒙古與蒙古舊屬於韃靼其後韃靼諸部皆微而蒙古獨盛於是蒙古之名始著此書謂至是乃自號蒙古竊恐不然但元史叙其先世事甚畧無可考質姑仍舊文而附論之云蓋金國盛時

置東北招討司以捍禦萌骨高麗西南招討司以統隸北方西夏萌骨所據蓋金國太宗創業時地二十七團寨而北方之境東接臨潢府西與夏國鄰南距靜州北抵大人國今盡為所有矣又先有鄰於金界者其部長封北平王被殺其弟繼立其子博思巴方

二歲大金取歸國中養於黑水千戶家章宗泰和七年丁卯春北平王之弟和卓進貢金國乘其無備醉

而殺之復立博思巴為王

宋通鑑云韃靼有黑白之分此白韃靼也

遣還

國始博思巴在黑水千戶家見其女悅之至是欲娶為妻國中不從博思巴怨怒叛歸黑韃靼以此益強漸并諸族地遂起兵攻河西不數年河西州郡悉為所破又獲夏國偽公主而去夏人反臣事之

秋七月壬戌太白經天

按金史大安元年二月太白晝見經天而是年太白經天紀志

皆不
書

十八日蒙古軍自和龍進直趨山後與我兵戰於灰河
凡三日勝負未分蒙古軍三千騎馳突衝擊我兵大亂
蒙古軍乘之帝急命西京留守赫舍哩執中領軍迎敵
於大勝甸執中大敗奔還蒙古軍至屏口我兵又敗
執中者老將也知兵善戰自帝立心常不服至是不
肯力戰其下觀望遂大敗執中以百騎奔還上怒罷
之

九月十四日蒙古軍攻奉聖州二日城陷進軍野狐嶺
統軍通吉摩吉達不戰而潰

時奉聖州破蒙古軍至野狐嶺帝遣平章軍國事通
吉摩吉達同烏蘭達將兵以禦之相遇於野狐嶺下
通吉按兵不戰日將夕令諸軍下寨蒙古軍乘我兵
不備出谷衝突又調一軍轉出其後我兵腹背受敵
大恐潰散蒙古軍逐之遂大敗死者蔽野塞川
冬十月蒙古軍至晉山縣統軍完顏齊錦又敗

晉山距燕京一百八十里帝遣殿前點檢完顏齊錦
統兵數萬出城戰又敗

十一月己酉朔日有食之

十二月一日蒙古軍至昌平

時南宋遣使余鼎來賀正旦道不通而還

聶希古奏請大興尹烏蘭用章榜諭居民使自為計

時城內外亂甚老弱奔號少尹張天和奏請京城一

十八門

按此書燕京制度言燕京十二門金史地理志言十三門此云十八門疑誤

隨方

便自門以出凡永順東義寧化新興等縣皆有城壁
許其容受民皆饑凍死者相望翼早諫議余昌世請
避敵高者年曰事已至此惟有死守萬一足離京城
敵隨後至豈容我有駐足之處

命京城富室遷入東子城百官屬入南子城宗室保西
城戚里保北城各分守兵二萬凡市廬小民聽其自避
初忠獻王尼雅滿之有志於都燕也因遼入宮闕於
內外城築四城每城各三里前後各一門樓櫓城塹

悉如邊城每城之內立教倉甲仗庫各穿複道與內城通時陳王烏紳及韓常笑其過計忠獻王曰百年間當以吾言為信及海陵煬王定都既營宮室欲撤其城翟天祺曰忠獻王是開國社稷元勲措置必有說乃止至是始驗

初七日遊騎至城下

完顏天驤遣中將圖克坦奔馳凡殺三千許人去大興門望見烟塵漲天鼓聲振地遂急奔回

是時蒙古軍營於城下

大興尹烏蘭用章分命京畿諸將亟毀在城橋梁瓦石悉運入四城往來以舟渡運不及者投之於水拆近城民屋為薪納之城中凡城外有儲蓄縱其搬運入城不許閉拒

完顏天驥欲以兵劫蒙古軍寨律明不可乃與聶希古連日為巷戰計

十一月蒙古軍攻南順門

天驥設拒馬於南柳街日已半黑縱北軍入以槊禦之使入於拒馬內且縱火燒兩行民屋街狹屋倒蒙古軍死傷甚衆退屯於南順門不再退俟火息乃退天驥力戰而死律明入守內城駕自巡城勞軍

十四日蒙古軍攻內東城

以民屋為樓與城上相敵隨毀隨立城中發砲擊之金吾衛將軍邵邕戰死

二十三日蒙古軍攻內城

四城兵皆送自城上擊之敵稍失勢

二十八日遣東安王出使請和且許以公主為婚

蒙古軍曰婚且待別日只是大軍至此豈得竟無犒
勞欲得駱駝三萬匹牛羊各五萬匹東安王曰此非
使人所得尋當奏之皇帝及晚入禁城以木舁懸入
帝命議之於明堂殿翰林學士張興之曰不可彼方
乏食因我請和復得六畜以為食將留攻不去獨不
見侯景運石頭米之事乎因命人取通鑑以呈聶希

古曰不可無以塞其意帝曰惟有金繒錦帛可耳

翼早凡懸金繒錦帛三百囊及東安王復出

蒙古軍大怒舉繒帛焚之欲烹東安王已而有勸止之者

至午攻內城轉急

發火砲擊碎西承天門樓又壘木於下復欲沃水為永完顏律明命城上縛大火炬數百薰炙於上且發擣木拒之夜遣百戶數十人劫蒙古軍寨殺傷甚衆

欽定重訂大金國志卷二十二

欽定四庫全書

欽定重訂大金國志卷二十三

紀年

東海郡侯下

壬申崇慶

按原書誤作重慶
已於年譜內辨明

元年春正月三日河東總管

統軍完顏及高陽帥遣賁興各將兵入援至易州完顏
及遣人使於蒙骨俾襲其國蒙古軍覺不得志亦欲請
和

乃許以羊一萬犒師蒙古軍又請止援兵之來高者
年曰此不可忠獻王及幹里雅布太子嘗以此術誤
南宋矣國家自嘗為之豈可復墮其計乃報以援兵
之來此不及知會被掠大將軍穆思順乘間走至賁
興軍言狀賁興與穆思順皆速進兵阻易水之上
十一日蒙古軍退取興中路歸

賁興等追之敗其後軍

十五日內城及四子城開

完顏及等見帝大哭帝亦泣曰燕京自天會初不惟
兵革殆將百年僧居道觀內外園苑百司庶府室屋
華盛焚毀無遺向非忠獻王有先見宏規國不立矣
時蒙古軍雖退行至臨潢其別將攻興化和建州永
霸皆陷之赤地千里聞燕軍退師亦回

二月蒙古遣其使來請婚且欲割宗錦以北

使至燕聶希古請許其婚議欲以熙宗第三女順國
公主嫁之而不從其割地之請且許以歲幣三十萬

遣王良復報聘至陰山致命

其國相聞之大怒曰此不必得我今引兵俟秋高時地與公主皆可有矣良復回已四月未

夏五月改元合祭天地於南郊祀開國功臣命有司定諡十七日連雨凡二十餘日

時京師市井蕭條草莽蔥茂大興尹烏蘭用章親課大興宰及千戶屯等耕墾廢田

山東路都運俞良裔河北路都運唐鼎各運米五萬石

至京師民皆呼萬歲

是年小稔然田之荒者動至百餘里草莽彌望狐兔
出沒盜賊縱橫莒淄濰河中陝西之寇動數萬人所
在屯結朝議謀欲討之張慶之以為民未安集歲雖
稔而力未蘇若調兵以平寇恐蒙古再來則不堪應
敵若用兩河簽兵止為敵餌無益也

秋九月二十七日報至蒙古軍自蒲興路取三韓哨騎
二百先至順州舉朝相顧不知為計

烏蘭用章與完顏律明曰復用往時規模張慶之力
爭謂當遷都以避帝不能決聶希古曰遷避當早為
之計今敵已迫順州朝發夕至一動足則內外紛潰
若何收拾此非策也當如去年竭力捍禦俟其兵退
然後別議今中京形勢宏壯猶可保守自燕以南皆
是小郡到大同中山方可以守亦不如此見成規模
用章曰多募強勇復修苑城守備百方皆已精思但
空國大舉去而復來今茲攻城志在必克守城先須

盡力兼自七月完顏叔良謝蒙骨已厚費金帛昨叔
良信歸云蒙骨極喜今當再募使人優與借官俾之
告急事寧許以重報敵軍必被其內撓希古曰用章
之言是也翌日以用章為樞密使用章且請兼府尹
事許之完顏律明且請守大城用章希古皆曰不可
大城汙漫凡七十餘里如何守設或不利必皆走入
小城倉皇急遽如何得入紀律一亂敵軍必踵至此
危道也不如從容養力以候其至但堅閉大城使之

不可徑入候其勞苦我以逸制勞憑高困之不易之策

冬十月十八日蒙古軍至城下

一屯仁皇寺一屯大安門

十一月初一日攻順陽門南順門四會門

樓上以沸湯浸糞沃之蒙古軍乍進乍退一將自北門梯城以上大呼而前用黑騎馳走諸門守兵皆潰用章令開苑城洞門納之

初二日午攻內城南甬道

左三衙統軍李思安令發礮木牛鼻砲擊之死者甚衆

初六日蒙古軍發民間所疊木植竹蘆等積甬道城下務與城平欲前搏戰

李思安自龍游池鑿地道以乾梯塗硫黃破絮蘸油間塞於所疊木之下初八午蒙古大軍登木堆用衝車大鐵椎燈火下發衆皆驚走蒙古元帥遣兵於夾

口用大刀不許其衆退焚死者臭不可聞希古請夜
劫其寨用章曰不可須是退有所據今蒙古軍據南
順門去子城九里萬一失利為其所覺羣起追逐開
城納衆則彼乘其間不納則無故棄三千人且損吾
氣希古喜曰樞密自艱難以來凡所說皆是社稷之
福也

是晚大雪我兵皆寒十四日雪霽

三大王雄自瀋州運乾蒸餅牛羊馬肉凡五十挽車

至蒙古軍甚喜

十七日蒙古軍攻內城

張瓊范臻率國兵自子城上用強弩射之死者甚衆
攻者不輟用大鐵鏡濶尺尾作尖柄以大錐錐磚上
踏之以上李思安待其上城頭用大刀斧砍碎飛屍
以下蒙古百計攻城不能克獨城內柴薪告乏乃拆
絳霄殿翠霄殿瓊華閣分給四城

二十五日蒙古軍退

范臻欲出兵追襲永興王使白用章用章曰不可蒙
古軍知我守五城共有十萬兵彼以攻城不得利今
若遇伏其敗必矣多遣則守城者少少遣則適為敵
擒此必有計姑少忍之至次早東翠園黃興觀果皆
有伏兵候我追之然後夾擊因復攻城衆乃服用章
料敵之明

十二月四日蒙古軍屯順州毀城忽不知所在

半月餘始知自古社越龍漢以去

癸酉至寧元年春正月改元大赦天下

三月遣中使六人於北軍所經殘蹂地分設魚肉酒炙
招魂奠醑內出祭文

其略曰禁烟祭先王俗所崇凡爾子孫以此為恭乃
今乏祀神哭陰風惟余一人致爾若此痛恨填臆有
賴其泚文既頒行讀者泣下

秋七月蒙古軍復至山後

都元帥完顏福興迎戰而敗帝黜之

八月起赫舍哩執中為右副元帥將武藝兵三千

按金史執

中傳作武衛軍五千兵志京師防城軍世宗大定十七年改為武衛軍

復往迎敵執中私

受敵賂放入紫荆關

二十日我軍發燕京至紫荆關執中開關延敵守關將士上下千里聞蒙古軍過關一時潰走不可禁遏執中還京見上言蒙古軍勢盛難敵臣急來保守京城上遣完顏綱將兵禦之戰於易州我兵大敗綱獨引百騎至都密奏執中受北賂故放入關執中聞之

懼誅

按金史執中傳執中權左副元帥將武衛軍五千屯中都城北通元門時元兵在近止務馳獵

不恤軍事上使責問由此作亂與此言延敵受賂不同金史言衛紹王記註亡失王鶚有志論著采實祥張正之等所記獨言遷嘉努兵敗赫舍哩執中作難事不相背蓋則史所記執中事必確此言延敵受賂

恐未必然

二十五日癸巳

按原書作二十六日壬辰考金史呼沙

李思中客上於邸是月巳巳朔癸巳乃二十五日也今改正

赫舍哩執中弑帝

先是左副元帥南平者

按金史云知大興府國克坦南平歸潛志云駙馬都尉南

平判天

興府迎合帝意沮格軍賞人共怨之執中因人心

之憤欲廢帝遂回軍以誅南平為名二十四日軍至東華門外召南平計事手刃殺之宮中聞變門皆不開執中召細軍大將金壽語之曰吾此來特誅亂臣耳非有叛意也俄而細軍來救駕壽諭止之衆憚執中威名無敢動者獨關西大漢軍都統完顏珊延引所部五百人至皆為武藝軍所殺執中以珊延驍勇召其父福海今招之珊延大呼告其父曰老賊欲反何為降之復力戰自旦至午手殺數十人身中數十

矢而死軍民相殺血流滿地執中遂進兵東華門帝
遣皇子蔣王持詔書投於門下募能殺執中者白身
除大興尹世襲千戶軍民皆無應者執中欲縱火焚
門守門將軍和卓啓之執中兵入宮衛侍皆散走進
至大安殿帝望見之遙呼曰令我何往曰歸舊府耳
帝入後宮邀皇后俱出后留之曰出則被殺矣執中
見帝久不至遣兵執之并后囚於舊府二十五日執
中夜遣內侍李監成弑帝於舊府宣宗即位降封為

東海郡侯

帝為人仁厚居兄弟中最賢侍世宗小心不懈歷承安
泰和年間鄭王內死愛王外叛一則曰蹈叔父子負之
何言二則曰蹈叔父餘殃毒我宗社骨肉疎忌遂成嫌
疑東海逢迎其間無少罅隙泰和年間盜賊縱橫邊圉
繹騷空一國之師力已不足矣及帝繼之倥傯日甚
又懷夙昔之憾遂動無名之師力不逮心輕仇外侮甚
至蔬食徒跣日焚香告天不幸適丁其會矣初即位時

命學士吳宗稷草詔具述國難及哀痛之意復降手詔諭愛王曰泰和猜忌兄弟失歡骨肉至親變為仇怨誘引外敵傾危本家計王之心亦復何忍往事已矣今宜改圖朕遭家多難靜晦以處忽諸父諸臣橫見推逼不容固辭王是朕之姪朕是王之叔勿行間言憑陵以逞叔姪二人同形共氣設復交鋒務行兼井太祖太宗在天之靈亦不錫佑昔梁答與湘東為叔姪之仇啓引周兵以陷江陵隨亦失國而為人虜此事宜監三復予言

愛王得詔泣下然勢已為蒙古軍所制不能自由京城
凡兩遭重圍而肘腋禍生執中之變起內外諸臣莫不
惋惜悲夫

欽定重訂大金國志卷二十三